

BATAKURU PUULUSA DIMMURU

HAA E 'BE KORENTI 'BEN

1 ¹Immorde e an min Puulusa, mo Alla hoddiri wonugol *sahaabaajo Iisaa Almasiihu on, wondude e oo musiddo wi'eteedo Timotee, haa e ngal *moftal Alla wongal Korenti, e gomdinbe wonbe Akaaya ben fow. ²Yo moyere e buttu wonan on immorde e Alla Baaba men, e Iisaa Almasiihu Joomi on.

Fii no Puulusa Jarniri Allaahu, Wakkilinoowo on

³Mantoore wonanii Alla, Ben Iisaa Almasiihu Joomi men on, on Baabaajo yurmeteedo e on Alla Jom wakkilaare fow, ⁴on wakkilinoowo en e nder kala tampereeji men, fii no enen kadi waawiren wakkilinirde ben wonbe e nder kala noone tampereeji wakkilaare nde hebirden Alla nden enen tigi. ⁵Ko fii, ko wano tampereeji *Almasiihu on layirta e hoore men non, ko wano non wakkilaare men nden layirta immorde e Almasiihu on. ⁶Si tawii men tampii, ko fii wakkilaare mon nden e fii kisiyee mon on. Si tawii men wakkilinaama, ko fii no wakkiliniredon, no wawniredon njanjaade tampereeji gooti e di men woni nabude din. ⁷Tama'u amen on e telen-ma mon ko selludo, ko fii meden andi, wano tawdiradon non e tampereeji amen din, ko wano non tawdiradon e wakkilaare amen nden.

⁸Men faalaaka yo on ronku andude, yo musibbe amen, tampereeji hebusi men din *Aazii di men sonjiraa, haa ka tawata alaa hattoode toonin doole amen den, haa men tayii hay wuurugol. ⁹Kono menen e hoore amen tigi, meden felliti men fawaama mayde, fii wota men fawu hoolaare amen nden e hoore amen menen tigi, kono e Alla on Immintinoowo maybe ben. ¹⁰Ko on jattini men, jattinoyta men kadi e sifa nden mayde. Hiiyii, meden tanyinii, o jattinoyay men ¹¹e nder ko faabortion men torndeeji kon. Ko non Alla jaabinirta torndeeji di duudube torantoo men din. Ko dun wadi si yimbe duudube jarnay Alla fii amen.

Fii no Puulusa Banginiri ko Hadi o Yiltitoo Korenti

¹² Ko men woni mantorde kon, ko ko bernde amen nden banginani men kon, wonde men wuuririi e oo aduna, tentinii telen-ma mon, nundal e haqiiqa ko iwri ka Alla, hara hinaa ko iwri e faamu neddanke, kono ko e sulfu Alla on. ¹³ Ko fii ko men woni on windande kon fow, ko ko waawoton jangude faamon. E mido tanyinii on faamay dun fota, ¹⁴ wano fuddordon faamude non wonde ko men be mantorton. Onon kadi ko on be men mantorta jnande ardu Iisaa Joomi men on.

¹⁵ E nder nden hoolaare, hari mido faalanoo yahude ka mon, fii no hebiron faabo Alla goo kadi. ¹⁶ Si mi iwriino ka mon, mi feyfa Masedonii. Nde mido iwta Masedonii, mi artira ka mon kadi fii no walliron mi no mi hewtira ka diiwal Yahuuda. ¹⁷ E nder anniyagol an dun, taw si hara mi mijiitaaki? Kaa hara on sikku den ebbooje an ko ebbooje neddanke, haa ka tawata no e an «hiiyii» e «oo'o»?

¹⁸ No Alla woniri sella-findeejo non, ko non tawiri kongol ngol men hewtini on ngol wonaa ngol «hiiyii» e «oo'o». ¹⁹ Ko fii *Biddo Alla on, dun ko Iisaa Almasiihu on, mo min e Silaasi e Timotee men waajii on fii mun on, hinaa mo «hiiyii» e «oo'o», kono ko «hiiyii» woni e makko. ²⁰ Fodooje Alla den fow ko «hiiyii» e makko, awa kadi ko kanko wi'irten Alla «aamiina» fii mangu makko ngun. ²¹ Ko Alla woni fellintinanoowo en fow wonde hiden humondiri e Almasiihu on. Ko kanko kadi subii en, ²² o maandiniri en maande makko nden, dun ko tol mugol Ruuhu makko on ka berde men.

²³ Alla ko seedee an: ko fii wota mi aanin on hadi mi yiltitoo Korenti. ²⁴ Hinaa fii meden laamii on e hoore gomfinal mon ngal, kono ko men gollidoobe e mon fii weltaare mon nden, bay hidon tabiti e nder gomfinal ngal.

2 ¹ Min tigi mi aadii wota mi yiltitodu ka mon e sokola. ² Ko fii min, si mi sokolinii on, haray ko hombo waawi lan weltinde, si hinaa onon hebirbe lan sokola ben?

³ Mi windiranii on nii fii wota mi hebir haanube weltinde lan ben sokola nde mi

aroyi. Mido joganii on fow ndee hoolaare wonde, weltaare an nden ko nde mon on fow.⁴ Ko e nder annde tiidunde e mettu bernde e gondi tiidudi mi windani on, hinaa non fii sokolingol on, kono ko fii no andiron giggol tiidungol ngol mi joganii on ngol.

Fii Yaafagol Bonnudo

⁵ Si tawii goddo e mon wonii sabu annde, haray hinaa min o aanini, kono ko on fow, maa wobbe e mon, (fii wota mi wowlu haa feyýita). ⁶ Feloore nde burbe ben e hakkunde mon fawi mo nden, yonay on neddo. ⁷ Haray jooni hidon haani mo yaafaade wakkilina, fii wota o sonjor sokola feyýitudo. ⁸ Awa mi torike on hollugol mo giggol. ⁹ Ko fii, ko mi windirannoo on, ko fii ndarndagol on annda si hidon doftii ko woni woo. ¹⁰ Ko fii kala mo yaafanidon, mi yaafanto mo min kadi. Telen-ma an min, si no woodi ko mi yaafuu, ko fii mon mi yaafori, e yeeso *Almasiihu on,¹¹ fii wota en accu Ibuliisa foola en, ko fii wonaa wa si en andaa eþbooje makko den.

Fii Annde Puulusa nden Turuwaasi

¹² Fewndo ko mi hewti Turuwaasi fii fenningol Kibaaru Moyýo Almasiihu on, mi tawi Joomiraado on no udditanimmi dambugal. ¹³ Kono tawi bernde an nden waalanooki, báy mi tawaali don oo musiddo an wi'eteedo Tiituusa. Onsay mi waynitii bë, mi fokkitani Masedonii.

¹⁴ Yo mantoore wonan Alla, on Wondo en okkude polgal soono woo e nder humondiral men e Almasiihu on, on Wondo en huutorde fii fenningol nokku kala urngol andugol Almasiihu on.¹⁵ Awa e hakkunde wonaabe dandeede ben, e hakkunde wonbe mulude ben, hidén wa'ani Alla wa angiri uurundi ndi Almasiihu on weebitani mo:¹⁶ hidén wonani wobbe ben barngol mayde nawrayngol e mayde, hidén wonani bëya ben urngol ngurndan nawrayngol e ngurndan. Ko neddo hombo gaynata sifa ðen golle?¹⁷ Ko fii men wa'aa wa wobbe, baanorbe

daaluyee Alla on, kono ko e nder haqiiqa men yewtirta e innde Alla, e yeeso Alla e nder humondiral amen e Almasiihu on.

Fii Yangantoobe Ahadi Heyri ndin

3 ¹E hara men fudditoto fahin kuljude hoore amen? Kaa men hatonjinay e bataake kuljude fii amen wano wobbe goo? Kaa ko onon haani wadangol men dun? ²Ko onon tigi woni batakuru amen, windiindu ka berde amen, ndu yimbe ben fow jangi, faami. ³No laabi, ko on batakuru *Almasiihu on, ndu menen tigi men yottini, ndu tawata hinaa ndaha windiraa, kono ko windiraandu Ruuhu Alla Wuurudo on, ndu tawata hinaa e hoore alluuje kaaye windaa, kono ko ka berde mon.

⁴Ko dun woni hoolaare nde men jogii immorde e Almasiihu on yeeso Alla.

⁵Hinaa wonde meden mari feere wadugol godsdun menen tigi, wa ko iwrata e mbawdi amen menen tigi. Kono mbawdi amen ndin ko e Alla iwri. ⁶O wawnii men kadi wonugol yangantoobe *ahadi heyri ndin, hara hinaa tippude e bindol sariya on, kono ko tippude e Ruuhu Allaahu on. Ko fii bindol ngol waray, kono Ruuhu on wurnay.

Fii Mangu Ahadi Heyri ndin

⁷Sariya Muusaa windiranoodo kalfe e hoore alluuje kaaye on arduno e ngun mangu haa ka tawata *Isra'iilayankeebe ben waawataa ndaarude yeeso Muusaa ngon sabu on annoora feyyoo wo wonnoodo ka yeeso makko. Si tawii golle on Sariya nawroowo e mayde ardi e sifa ngun mangu, ⁸haray ko haa honto non golle Ruuhu Allaahu on buri mawnude! ⁹Si tawii ko nawrata en e jaawoore kon mawninaama, haray ittii e sikke ko haa honto ko wadata en feewube yeeso Alla kon buri mawnude! ¹⁰Hiden waawi hay wi'ude wonde ngun mangu feyyungu fuutoraama mangu mun ngun fow, si ngu ebbindiraama e burngu mawnude ngu

hande ngun.¹¹ Si tawii ko feyyata kon hebii mangu, haray ko haa honto ko luttata kon mawnata!

¹² Awa oo tama'u doo no okki en hoolaare tiifunde. ¹³ En wadirtaa wano Muusaa non, on wadaynoodo tiggaare ka yeeso mun, fii wota Isra'iilayankeebe ben yi'u rawnoode annoora makko fey'oo wo on. ¹⁴ Kono, e nder mijooji mabbe dîn, berde mabbe den yoorii. Ko fii, haa weetaango hande ngoo, si *ahadi hinndi ndin janga, taway haa hande nden tiggaare no woodaa. Nde ittaaka, ko fii ko e Almasiihu on tun nde muti. ¹⁵ Haa weetaango hande ngoo, si Sariya Muusaa on janga, taway tiggaare no wirni berde mabbe den. ¹⁶ Kono si fewta e Joomiraado on, taway tiggaare nden ittaama ka berde mabbe. ¹⁷ E hin-le Joomiraado on ko Ruuhu, awa kadi ko ka Ruuhu Joomiraado on woni don, ko don ndimu ngun woni. ¹⁸ Enen, bë geece mun buumaaki ben fow, jalbirbe mangu Joomiraado on wa ndaarorgal, hidën e nder wattegol mbaadi makko, mangu e hoore mangu, immorde e Joomiraado on, dun ko on Ruuhu.

Fii Ngalu Mariingu e nder Loode Leydi

4 ¹ Ko dun wadi, bay Alla yedii men den golle e nder yurmeende makko nden, maayu bernde hebataa men. ² Men sali kala ko suudii hersinii, men wuuriitaa kadi yoyre, men boylataa kadi daaluyee Alla on, kono ko e nder ko men fenjinta goonga on kon, dun holnay kala bernde neddanke fii amen yeeso Alla. ³ Si tawii haa jooni Kibaaru Moyyo mo men waajotoo on no nibbitii, haray ko wonbe mulude ben o nibbitani, ⁴ dun ko ben bë gomdinaa, bë tawata alla nguu jamaanu wuminii mijooji mun, fii wota bë yi'u jalbeendi Kibaaru Moyyo bangindo mangu *Almasiihu on, on wondo mbaadi Alla. ⁵ Hinaa fii amen tigi men woni waajaade, kono ko fii Iisaa Almasiihu Joomi on men woni waajaade, menen non ko men kurkaadi mon sabu Iisaa. ⁶ Ko fii ko on Alla daaludo: «Yo ndaygu ngun jalbu ka

nder niwre»,^a ko kanko kadi jalbini berde amen den, fii ndaygingol e amen andal mangu Alla wongu e yeeso Almasiihu on ngon.

⁷ Enen jogiibe ngun ngalu, hiden wa'i wa loode leydi, fii no andiree wonde ngal bawgal mawngal ko e Alla iwi, hinaa e amen. ⁸ Men bittiraama nooneeji din fow, kono men muncaaki. Men jibii, kono men tayaaki. ⁹ Men cukkaa, kono men hawkaaka. Men libaa, kono men hayraali. ¹⁰ Meden wondi e mayde Iisaa nden saa'i kala ka balli amen, fii no ngurndan Iisaa dan feejira ka balli amen. ¹¹ Ko fii enen wurbe ben soono woo, hiden weebitanaa mayde nden sabu Iisaa, fii no ngurndan Iisaa dan kadi feejira e balli men maayooji din. ¹² Ko non men weebitorani mayde nden fii no hebiron ngurndan.

¹³ Wano windori non: «Mi gomdinii, ko dun wadi si mi wowli.»^b Menen kadi bay ko noone gomdinial gootal men mari, meden gomdini, ko dun wadi si meden wowlude,¹⁴ e nder andugol wonde, on Immintindo Iisaa Joomi on, o immintiniday en kadi e Iisaa, o weebitida men e mon yeeso makko. ¹⁵ Ko fii, dun fow ko woni ardude ko fii mon, fii yo sulfu on burtu hewtude yimbe duudube, fii no yettooje den ka mangu Alla laatora duudude. ¹⁶ Ko dun wadi si maayu bernde hebataa men. Hay si bandu amen ndun jolii, kono haray nder amen on no heyditude jande woo jande. ¹⁷ Ko fii oo saa'i satteende e fandude mun, o rimanay en darja teddudo poomayankeejo burdo oo saa'i satteende. ¹⁸ Ko fii menen, wonaa ko yi'otoo kon men wadi hakkilaaji amen din e mun, kono ko ko yi'otaako kon men wadi hakkillaaji amen e mun. Ko fii ko yi'otoo kon, ko ko feyyata, ko yi'otaako kon, ko ko luttata haa poomaa.

^a4.6 Fud. 1.3

^b4.13 Zab. 116.10

Fii Wonunde Kammuyankeere nden

5 ¹Hiden andi wonde, si tawii dii togooji dii hoduden e mun ka leydi doo, (e maanaa galli men din), aru e bonneede, haray hidēn mari suudu ndu Alla ebbani en, dun ko wonunde poomayankeere, nde tawata hinaa juude neddanke moyyinira. ²Awa kadi e nder din togooji, hidēn woytaade fii faale bornagol wonunde kammuyankeere nden, ³tawa ko en borniibe, hara tawetaake ko en darorbe nii. ⁴Ko dun wadi, enen wonbe e nder din togooji, hidēn woytaade, hidēn sonjii, bay en faalaaka laataade bortiibe, kono hara ko borniibe, fii no ngurndan dan modira mayde nden. ⁵Awa on Hebulindo en fii nden ebbore ko Alla, on Tolmudo Ruuhu mun on e men.

⁶ Awa hidēn heewi soono woo wakkilaare. Hidēn andi kadi fodde hidēn wondi e nduu bandu, haray hidēn wodfondiri e Joomiraado on. ⁷Ko fii, ko gomfinal ngal woni en ardaade, hinaa giide den. ⁸Hidēn heewi wakkilaare, ko burden faaleede ko seedugol e nduu bandu hoda moggo Joomiraado on. ⁹Ko dun wadi, wonduden e nduu bandu maa seeduden e mayru, himme men den ko welegol Joomiraado on. ¹⁰Ko fii en fow en darnete ka yeeso jaawirde *Almasiihu on, fii no o jonnitira mo kala njoddi kuude mun de o wadunoo ka aduna, woni ko ko moyyī, woni ko ko boni.

Fii Moyyintingol hakkunde Yimbe 6en e Alla

¹¹ Awa, bay men andii ko woni hulugol Joomiraado on, meden dabbude no men fellintinira yimbe 6en. Alla no andi ko men hombe, awa mido tanyinii onon kadi ka nder berde mon hidon andi men. ¹²Men alaa kuljude hoore amen kadi, kono ko dalil men woni on jonnude fii no mantoron men, fii no waawiron jaaborde 6en wonbe mantorde ko woni e kene kon edii 6e mantorde ko woni e bernde kon. ¹³Si tawii ko men wiliibe, haray andee wonde ko fii Alla men wilanii. Si tawii kadi non meden selli, haray andee wonde ko fii mon men sellani. ¹⁴Ko fii giggol Almasiihu

on no laamii men, menen bee fellitube dundoo: aaden gooto maayanii fow, awa fow maayii.¹⁵ O maayanii fow, fii wota wurbe ben wuuran hoore mun hande kadi, kono yo wuuran Maydo immintinaa fii mabbe on.

¹⁶ Dun haray gila jooni men jogoraa hay gooto e noone no yimbe oo aduna jogorta goddo non. Hay si tawiino hari men jogoriino Almasiihu on wano non, jooni men jogoraa mo non hande kadi.¹⁷ Si tawii goddo no humondiri e Almasiihu on, haray ko o tagudi heyri, haray piiji kiddi din feyirii mo, haray piiji din fow wontii kesi.¹⁸ Dun fow ko immorde e Alla woni, on Moyyintindo hakkunde men e makko rewrude e Almasiihu on. O yedi men menen kadi golle moyyintingol hakkunde yimbe ben e makko kanko Alla.¹⁹ Ko fii Alla moyyintinii hakkunde makko e aduna on rewrude e Almasiihu on, e baawo joganagol yimbe ben bonnereeji mabbe din, o halfinii men menen kadi kongol moyyintingol hakkunde yimbe ben e makko.²⁰ Awa ko men be Almasiihu on immini^c wa si tawii Alla no rewrude e amen fii waajagol. Awa men jeejii on e innde Almasiihu on: wonee welditube e Alla.²¹ On mo junuubu alaa e mun, dun ko Iisaa Almasiihu on, Alla wadii mo junuubu fii men, fii, sabu humondiral men e Almasiihu on, no woniren feewube Alla.

6¹ Bay ko men gollidoobe, men wakkilinii on wota on jabir sulfu Alla on meere.
² Ko fii himo daali:

«Mi jaabinanii ma ka saa'i sulfu,
ka nalaande kisiyee mi faabike ma.»^d

Awa mi andinii on ko fewndo doo woni saa'i sulfu on, awa kadi ko nalaande kisiyee nden nii.

^c5.20 «Ko men be Almasiihu on immini» no firi «ambassadeurs» e haala Gereeki.

^d6.2 Isa. 49.8

Fii Tampereeji Puulusa dîn

³ Awa men wonataa sabu peggal woo e hoore hay gooto, fii wota golle amen den wonu huunde felniinde. ⁴ E kala huunde men ɓanginay ko men kurkantooɓe Alla, e nder ƙajjnande buy, e nder tampereeji dîn e ƙakkireede, e nder anndeeji, ⁵ e nder pigge e kaseede e murtaneede, e golleeji sattudi e angal doyngol e heege. ⁶ Meden fejjninira dun laabal e gandal e munjal e moyyuki e *Ruuhu Seniido on e giggol ngol alaa faasiqankaaku, ⁷ wondude e daaluyee goongaajo on e bawde Alla den, peewal ngal wona aala amen habirdo e hiwitordo. ⁸ E hoore meden teddinee e meden hoynee, meden wowlee ko boni e meden wowlee ko moyyi. Meden jogoree wa fenoobe, hara-le ko men wowloobe goonga. ⁹ Men jogoree wa ɓe andaaka fii kala meden andaa, wa wonbe maayude e hin-le meden wuuri, maa wa wonaabe letteede fii kala men waraaka, ¹⁰ wa sokolnaabe e hin-le saa'i kala meden weltii, wa billiibe hara-le meden aldsinde duudube, wa ɓe alaa huunde e hin-le meden mari fow.

¹¹ Ko onon yo ɓe Korenti, men haalanii on ko woni e amen kon, meden yañjani onberde amen den. ¹² Men faadinanaali on berde amen den, kono ko onon tigi faadinani men berde mon den. ¹³ Awa mido yewtira on wa faybe an: onon kadi wadiranee men wano men wadirani on non, udditanon men berde mon den!

Fii Wodditagol ko Boni

¹⁴ Wota on humondir e ɓe gomdinaa ben. Ko fii ko humondiral hongal woni hakkunde peewal ngal e angal peewal ngal? Maa ko kawtital hongal woni hakkunde ndaygu e niwre? ¹⁵ E ko nanondiral hongal woni hakkunde *Almasiihu on e Ibuliisa?^d E ko gebal hongal gomdinbe ben e ɓe gomdinaa ben hawti? ¹⁶ E ko *ahadi hondi wondi suudu Alla ndun e sanamuoji dîn? Ko fii, ko enen woni suudu Alla Wuurudo on, wano Alla daaliri non:

^d6.15 Ndee innde Ibuliisa doo e haala Gereeki ko «Beliyar».

«Mi hoday, mi jinda hakkunde ma  be,
mi wona Alla ma  be,  e wona jamaa an.»^e

¹⁷ Ko dun wadi si Joomiraado on daali:

«Iwee e hakkunde ma  be, seedon,
wota on meemu ko laabaa,
min mi ja  boyo to on.

¹⁸ «Mi wonanay on Baaba,
onon wonanon mi  ib  be worbe e  ib  be rewbe.

Ko Joomiraado Jom Bawgal on daali dun.»^f

7 ¹ Bay non hidен mari wano dii fodaariiji, yo yib  be, labbinoden e kala ko tuuninta
bandu ndun e ruuhu on, e hoore timmingol laabal ngal e nder kulol Alla.

Fii Tuubuubuyee  e Korenti  en e Weltaare Puulusa nden

² Wernee men ka berde mon, ko fii men fawnaaki hay e gooto, men bonaali
kadi hay gooto, awa kadi men huutoraali hay gooto. ³ Hinaa fii felugol on mi wi'iri
dun, ko fii hari mi wi'uno wonde hidon ka berde amen, woni ngurndan, woni
mayde. ⁴ Mido mari hoolaare tiifunde e telen-ma mon, mido mari ko mi mantora
fii mon fota, mido wakkilinaa fota, mido heewi weltaare e nder dii satteendeeji
amen fow.

⁵ Ko fii gila men hewti Masedonii, men hebaali feere no men fowtora hay seeda,
men tampiniraama noone fow, gere ka kene, kulol ka nder. ⁶ Kono Alla,
Wakkilinoowo miskinbe  en, o wakkilinirii men ardu Tiitusa ndun. ⁷ Wonaa non
ardu makko ndun tun o wakkiliniri men, kono kadi, ko wakkilaare nde
wakkilindon mo nden. O sifanike men faale mon tiidudo on e gondi mon din e
cataare mon nden fii an. Dun wadi haa weltaare an nden burti tiidude.

^e6.16 Lew. 26.11-12 e Haz. 37.27

^f6.17-18 Isa. 52.11, Haz. 20.34-41, 2Sam. 7.8-14

⁸ Hay si tawii mi sokolinirii on batakuru an ndun, mi ninsaa dun jooni, hay si tawii mido ninsunoo. Ko fii mido sutii wonde ndun batakuru ko sokolini on ko haa seeda. ⁹ Fewndo doo mido weltii, hinaa non fii ko sokoldon kon, kono ko fii ko sokola mon on addi on e tuubuubuyee kon, ko fii on sokoliniraama no Alla yidiri, bay on hebiraali men bone woo. ¹⁰ Ko dun wadi, sokola mo Alla yidi on adday tuubuubuyee nawroowo e kisiyee mo en ninsataa, e hin-le sokola oo aduna ko addata ko mayde. ¹¹ Awa on yi'ii ko oo sokola mo Alla yidi wadi e mon kon: dun ko wakkilaare, e faale danditagol toone, e ko tikkudon kon, e ko yaldudon fii bone wadaado on, e faale mon moyyo fii yi'itugol lan, e cataare mon nden, e hebulaare mon nden fii donkingol bonnudo on. On holliri noone fow wonde on tawaaka e nduu muraadu. ¹² Awa si mi windanii on, hinaa sabu fawjniido on, maa fawnaado e mun on, kono ko fii no jogitordon men non feenirana on onon tigi yeeso Alla. ¹³ Ko dun wadi si men wakkilinaa. Kono e hoore nden wakkilaare amen, men burti weltorde weltaare nde Tiituusa weltinaa nden, on mo on fow weltindon bernde mun. ¹⁴ Si tawii mi mantorii fii mon yeeso makko seeda, haray mi hersiraa dun, kono ko wano ko men yewtata on saa'i woo kon woniri goonga non, ko non ko men mantori moggo Tiituusa kon woniri kadi goonga. ¹⁵ Awa kadi giggol ngol o joganii on ngol ko tiidungol, tuma kala o anditi ko doftidon mo kon on fow e noone no tolnidron mo non kulol e teddungal. ¹⁶ Mido weltori waawugol hoolorgol on e kala huunde.

Fii no Puulusa Wakkiliniri Mofte den fii Okkugol

8 ¹ Men andinay on, yo musibbe, fii ndee moyere Alla yedaande *mofte makko den Masedonii, ² e maanaa, noone satteendeeji di be ndarndaa woo, weltaare mabbe heewunde nden e billaare mabbe tiidunde nden no okkude be feere okkirkol no yaajiri. ³ Yeru mbawdi mabbe ndin, mido seeditii, be wadii hay toonin mbawdi mabbe ndin e hoore anniyee moyyo. ⁴ Be landike men, e nder tentingol

no tiidiri, yo ɓe tawde e faabagol yimɓe Alla ɓen.⁵ Dun feyyíti ko men tanyininoo kon. Kambe tigi ɓe weebitanii Joomi on taho, si ɓe weebitanii men no yaadiri e faale Alla on.⁶ Ko dun wadi si men wakkilini Tiituusa yahugol ka mon fii wallugol on laatinde ndee moyyere, wano o fuddornoo non.⁷ Wano tawiri non hidon moyyí e dí fow, ka gomdinal, ka kongol, ka gandal, ka cataare timmunde, e ka giggol mon e telen-ma amen, moyyiniree non kadi ndee moyyere.

⁸ Mi wowliraali dun fii wadugol yamiroore, kono mi wowlan on fii hollugol banaare beya nden, mi anda si giggol mon ngol ko haqiqawol.⁹ Ko fii hidon andi moyyere Iisaa Almasiihu Joomi men on, fii kala ko aldunoodo, o waditii baaso fii mon, fii yo baasal makko ngal aldin on.¹⁰ E hino ko mi miijii no hawrani on kon: Bay ko onon adinoo anniyaade dokkal gila rowani, ko onon adii wadugol dun kadi.¹¹ Awa jooni, jokkee dun haa timma, nabon haa joofoya, beru wakkilaare mon nden, wondude e anniye mo aadidon on.¹² Si en okkiri anniye moyyó, haray dun ko ko jabete tippude e ko marden kon, hara hinaa e ko en maraa kon.

¹³ Hinaa non fii bittingol on, weltina beya, kono ko fii yo fotondiral wadu.

¹⁴ Fewndo doo ko ko burtani on kon wondon faaborde baasal beya ngal, fii no kambe kadi ɓe faabora baasal mon ngal ko burtani ɓe kon. Si wonirii non, fow fotay,¹⁵ wano windori non:

«Marnoodo buy on wontanii dun ko hawri,
on marnoodo kadi seeda, huunde ɻakkiraa dun.»^g

Fii Tiituusa e ɓe o Immindinaa ɓen

¹⁶ Yettoore wonanii Alla fii ko o wadi e bernde Tiituusa kon sifa cataare nde mi joganii on nden.¹⁷ Fii kala non o jabii ebboore an nden fii yo o yahu ka mon, kono hari o aadike, wondude e tinnaare tiidunde, wonde o yahay kanko tigi ka mon.

¹⁸ Men immindinii mo e oo musiddo mo mofte den fow mantu fii golle de o wadani

^g8.15 Egg. 16.18

Kibaaru Moyýo on den.¹⁹ E hoore dun, ko mofte den toddii mo fii ko wona yaadiddo amen, e nder ndee moyýere nde tawata meden fawtii fii mangu Joomiraado on tigi, e fii seedintingol anniyeji amen moyýi din.²⁰ Meden faalaa reenaade fii wota men fele fii ngal dokkal mawngal ngal men halfinaa.²¹ Ko fii ko ko moyýi kon men woni dabbude, hinaa non yeeso Joomiraado on tun, kono kadi e yeeso yimbe ben.

²² Men immindinii ɓe e oo musiddo amen, on mo men ndarndori noone woo cataare makko nden e laabiji buy, on wondo ɓanginirde ko tiidi e ngal doo, hoolaare mawnde nde o joganii on nden.²³ Tiituusa non, ko o wondiddo an e gollidoowo e an fii mon, musibbe ɓe o wondi ben non, ko be mofte den immini, ko ɓe darja *Almasiihu on.^{h24} Awa hollee mofte den fow dalil giggol mon ngol e ko men woni mantorde fii mon kon yeeso mabbe.

9 ¹Nafa alaa mido windana on fii ballal fokkintinanaangal yimbe Alla ben.² Awa mido andi anniye mon moyýo on fii wallugol, ko fii dun mi woni mantorde on e yeoso ɓe Masedonii ben, mi wi'a wonde, gila rowani bee ka diwal Akaaya no hebulii wallugol. Awa kadi cataare mon nden wakkilinii yimbe buy okkugol.³ Mi imminii bee musibbe fii wota mantoore nde men mani on nden wonu meere, e yo on wonu hebuliibe fii wallugol wano mi wi'iri non.⁴ Si tawii men tawoyii on hebulaaki nde min e ɓe Masedonii ben men yaadoyi ka mon, haray hoolaare nde men hoolii on nden wontanay men hersa, haray onon hersa mon kan wowlotaako.⁵ Awa mi taw no hawri ka mi wakkilina musibbe ben ka ɓe adoyoo mi ka mon, ɓe wona e fii ballal ngal fodudon ngal, fii no ngal hebilora ngal wona okkiraangal anniye moyýo, hara hinaa wa si tawii ko kuugal karahaangal.

^h8.23 Maa: «ko ɓe golloobe fii darja Almasiihu on.»

Fii Fodaari Wadanaandi Aaden Dokko

⁶ Andee wonde : mo sankii seeda ko seeda o wa'ata, mo sankii buy ko buy o wa'ata. ⁷ Yo mo kala okkir wano o anniyori non ka ɓernde makko, e baawo ninsugol maa karhegol, ko fii Alla no yidi on okkiroowo weltaare. ⁸ Awa Alla no mari bawgal hebbingol e mon kala noone moyyere, fii no hebiron saa'i kala ko hatonjindon e mun kon fow, e no wadirion kadi kala kuugal moyyal haa feyfita, ⁹ wano windori non wonde:

«O saakitii dokke,
o yedii miskinbe ɓen,
peewal makko ngal ko luttoowal haa poomaa.»ⁱ

¹⁰ On Jonnoowo remoowo on awdi, jonnay mo kadi jaametee ko on jaama, o yedoyay on onon kadi, o sowindirana on awdi ndin, o ɓeyda battane peewal mon ngal. ¹¹ Ko non aldiniroyledon e kala noone fii no waawiron okkirde no yaajiri. Immorde e ngal ballal ngal men hendorta on men hewtina ɓe, dun adday yettooje Alla. ¹² Ko fii ngal ballal ngal wadudon faaboto yimbe Alla ɓen, kono kadi ɓeyday yettooje Alla duudude. ¹³ Bay dee golle mon taskaama, tawaama ko haqiqaaaje, Alla mawninte sabu yankinaare mon nden e telen-ma qirritagol Kibaaru Moyyo *Almasiihu on, e sabu ballal mon yaajungal ngal wallirdon ɓe ngal, kambe e yimbe ɓen fow. ¹⁴ Dun, ɓe toronto on wondude e giggol, sabu moyyere feyfitunde nde Alla wadani on nden. ¹⁵ Yo yettoore wonan Alla fii dokkal makko ngal sifotaako ngal!

Fii no Puulusa Jaabori Aybinoobe Golle makko den

10

¹ Min Puulusa, mi tororii on newaare e moyyuki *Almasiihu on, min oo newiido e yeeso mon, e heewudo cuucal fii mon ka wodditii on. ² Awa mi jeejii on, wota on karhan yo mi bangin cuucal nde mi hewtoyi ka mon, ko fii mido anniyii

ⁱ9.9 Zab. 112.9

seedintinirde hoolaare an nden cuucal e fee ben sikkube wonde meden wuuriri wa yimbe aduna.³ Hay si tawii wonii ko men yimbe aduna, men habirtaa wano be aduna ben gerdata non,⁴ ko fii aalaaji di men habirta din hinaa di oo aduna, kono ko wondudi e bawgal iwrungal e Alla fii libugol kala ko dartotoo mo. Men libay miijooji fenaandeeji din⁵ e kala mawnintinaare hawtotoonde dartoo gandal fii Alla ngal, e men dahay kala mijo haa ngo doftoo Almasiihu on.⁶ Si doftaare mon nden timmii, meden hebulanii kadi donkingol kala ko doftaaki.

⁷ Awa ndaaree no piiji din woniri non. Si goddo fellitanii hoore mun tigi wonde himo humondiri e Almasiihu on, yo o fellitan hoore makko dundoo: si himo humondiri e Almasiihu on, menen kadi men.⁸ E hay si mi mantorii ko burti seeda mbawdi ndi Joomiraado on yedi men ndin fii tabitingol on, hara hinaa fii libugol on, haray mi hersoytaa.⁹ Mi faalaaka wa'ude wa hulbiniroowo on bataake an den.¹⁰ Ko fii hibe wi'a: «Dee bataake no tiidi no jaadi, kono si tawii kanko himo doo, haray himo daati, haalaaji makko din no mehidi.»¹¹ Kala non jogiido ngoo mijo, yo andu fota wonde: kala ko men windani on e baawo mon, ko dun men wadata e tawnde mon.

¹² Men fotondirtaa maa men ebbindirtaa hoore amen e wonbe hollitaade ben, kono e nder etitagol mabbe ngol e ebbitagol mabbe ngol kambe tigi, dun hollii ko be njakkiraabe faamu.¹³ Menen non, men yidaa mawnintinorde ko feyýiti etirde, kono men feyýataa keerol ngol Alla yedi men ngol, ko dun kadi hewtini men haa ka mon.¹⁴ Men feyýitataa keerol amen ngol, wa si tawii hari men araali haa e mon, ko fii ko goonga, ko haa e mon men ardi e Kibaaru Moyýo Almasiihu on.

¹⁵ Awa men feyýitirtaa keerol mantorgol golleeji wobbe goo, kono meden mari tama'u wonde si gomdinal mon ngal beydike, men waaway kadi laatinde golle burde mawnude e hakkunde mon,¹⁶ e nder waajagol e ca'e wonde toonin mon den, doo yo men mantor ko wadaa kon ka nokkeeli beya.¹⁷ «On mo no mantoo, yo

mantor Joomiraado on.»^{j18} Ko fii wonaa kuljudo hoore mun on jabaa, kono ko mo Joomiraado on kulji on.

Fii no Puulusa Banginiri fii Waditiibe Sahaabaabe ben

11 ¹Jooni non, mido tanyinii on waawayno mujnanaade lan, mi yewta on haalaaji komoyaagal seeda. Mido felliti on mujnanto lan! ²Ko fii mido nawlani on nawliigu iwrungu ka Alla, bay mi tananike on gorko gooto, fii weebitugol on ka *Almasiihu on, wa jiwō laabudo mo andaali gorko. ³Kono mido huli fota wota on accu mijooji mon din selnee e humondiral mon laabungal e haqiqawal ngal e telen-ma Almasiihu on, wano *Hawaacciri mboddi ndin dayniri mo yoyre mun non. ⁴Ko fii si goddo aru on fejjinande fii lisaajo goo, seedudo e mo men fejjinani on on, maa si on hendike ruuhu goo seedudo e mo hedinodon on, maa *Linjiila^k goo seedudo e mo jabunodon on, haray on tewtike mo fota. ⁵E hin-le mido felliti, ben «sahaabaabe townitiibe»buraa lan hay huunde. ⁶Fii kala mido hesidani waajagol, kono mi hesidanaa gandal ngal, men hollirii on dun noone fow e di fow.

⁷Kaa hara mi wadii junuubu fewndo mi duytitii fii bantugol on, wa fewndo ko mi fejjinani on Kibaaru Moyyo on e baawo yantugol on hay huunde? ⁸Mi ittinii *mofte goo fii hebirgol be njoddi fii wallitagol on. ⁹E hin-le fewndo mi njakkiraa ka mon, mi wonaano dongal hay gooto, ko fii musibbe iwruube Masedonii ben faaboranno ko mi njakkiraa kon fow. Mi reenino wonugol dongal mon, e mi burtay-le reenaade e dun. ¹⁰Fodde goonga Almasiihu on no e an, mido wi'i: hay gooto fannataa lan mantorgol dun e nder diiwal Akaaya ngal fow. ¹¹Fii hondun non? Hara ko fii mi yidaa on? Alla no andi mido yidi on.

^j10.17 Yer. 9.23

^k11.4 Dun ko Kibaaru Moyyo on.

¹² Ko mi woni wadude kon, mi jokkay wadugol dun kadi, fii hadugol ben faalaabe mantorde fotugol e amen. ¹³ Ben ko waditiibe sahaabaabe, golloobe daynoobe, wadinkiniibe sahaabaabe Almasiihu on. ¹⁴ Kono dun yaldinaa, ko fii Ibuliisa tigi ko wadinkinotoodo malaa'ikaajo ndaygu. ¹⁵ Haray juhaa kadi ka golloobe makko ben wadinkinoo golloobe peewal. Kono rawnoode mabbe nden wa'ay wa kuude maabbe den.

Fii Golleeji e Tampereeji Puulusa din

¹⁶ Awa mido fillitaade kadi: wota gooto ndaariran wa komoojo. Si hinaa dun, jogoree lan wa komoojo, fii min kadi no mi mantora seeda. ¹⁷ Ko mi woni wowlude koo e nder hoolaare hebugol ko mi mantora, hinaa ko iwri e Joomiraado on, kono ko wa komoojo. ¹⁸ Bay duudube no mantorde piiji aduna, min kadi mi mantoray dun. ¹⁹ Awa, onon marbe faamu ben, on mujnanto no newori komoobe ben! ²⁰ Hidon mujnaade kadi ko kurketedon kon e ko huutortedon kon e ko jattetedon kon e ko jogortedon mawnintinaare kon e hay banteede. ²¹ Meden hersi wi'ugol wonde meden lo'i e telen-ma dii piiji!

Kala ko goddo suusi mantorde, haray min kadi mido suusi, (ko wa komoojo mi woni wowlirde). ²² Si ko be *Aabirayankeebe? Awa min kadi men. Si ko be *Isra'ilayankeebe? Awa min kadi men. Si ko be jurriya Ibraahiima? Awa min kadi men. ²³ Kaa ko be kurkaadi Almasiihu on? Awa mido yewtirde komoyaagal, min kadi ko mi buri dun! Telen-ma ka golleeji mido buri be, ka kaseede mido buri be, ka piyeede, don kadi mido buri be, soono woo mido weebitanii mayde. ²⁴ Laabi jowi mido hebirde Yahuudiyankeebe ben paatawol cappande nay yakkudun ngol gooto! ²⁵ Laabi tati mido luuboreede bedi, mi fidaa kaaye nde wootere, laabi tati mi tawaa e nder laade wonde lancaade, mi wonii kadi ka ndiyan nallal gootal e jemma gooto, mido awya. ²⁶ Soono woo e nder jinduruuji an din haray mido weebitanii masiibooji din ka maaje, e masiibooji hippotoobe ben, e masiibooji

yimbe lejol an ngol, e masiibooji 6e wonaa Yahuudiyanke ben, e masiibooji din ka ca'e, e masiibooji din ka wulaaji, e masiibooji din ka baharu, e masiibooji wi'itiibe ben ko men musibbe,²⁷ e ka golle e ka satteende, e jemmaaji di daanaaka, e heege e donka e njakkireede jaametee, e jaangol e kolngal!^{m28} E hoore mi wowlaali fii ko heddii e dongal ngal mi rondii jnande woo fii aanangol mofte den fow.²⁹ Si goddo lo'ii, hewtay lan. Si goddo yanii e junuubu, ko min muusata.

³⁰ Si tawii bee mi mantoo, haray ko fii lo'ere an nden mi mantotoo. ³¹ Alla, on wondo Ben Iisaa Joomi on, on mo mantoore wonani haa poomaa, no andi wonde mi fenataa. ³² Oo lando Damaasi wi'eteedo Aretaasa ittayno ko ayna saare Damaasiyankoobe ben fii nangugol lan. ³³ Kono mi tumbaa e debeere, mi tippiniraa e yolnde, jokkinaa maadi ndin, ko nii mi fuutori 6e.

Fii Fejjinaneede Puulusa

12 ¹Bee mi mantoo, fii kala dun nafataa. Kono fow e mun yo mi yewtu fii wirnitande e fejjinande iwrude ka Joomiraado on. ² Wonii nii duubi sappoo e nay mido andi goddo gomdindo *Almasiihu on, nabanoodo ka kammu tatabu,ⁿ (mi andaa non si ko kanko tigi maa si ko ruuhu makko on, kono Alla kajun no andi). ³⁻⁴ Ko mi andi tun, on nabaama ka aljanna, o nanii kongudi di sifotaako, di newnanaaka neddo fillagol, (mi andaa non si tawii ko kanko tigi maa si tawii ko ruuhu makko on, kono Alla kajun no andi). ⁵ Ko sifa on neddo mi mantorta, kono mi mantortaa hoore an tigi, si hinaa fii lo'ereeji an din. ⁶ Si tawii mido faalaa mantaade, mi wonataa komoojo, ko fii mi wowloyay goonga, kono mi mantotaako, fii wota goddo tuuman toonin ko o woni yi'irde lan kon, maa ko o woni lan nanirde kon. ⁷ Sabu dee fejjinande mawde de mi fejjinanaa, mi hebuno ko tampinirimmi wa bullal ka bandu an fii wota mi manto, dun ko mo

^m11.27 Maa: «kolndan.»

ⁿ12.2 Ko Puulusa tigi woni on goddo mo o woni wowlude fii mun.

Ibuliisa imminnoo fii tampingol lan.⁸ Laabijji tati mido jeejude Joomiraado on yo o woddintinan dün, ⁹ o jaabii lan: «Moyyere an nden yonii ma, ko fii bawgal an ngal ko e nder lo'ere nden bangata.» Awa mi feyday mantaade fii lo'ereeji an din, fii no bawgal Almasiihu on wonira e hoore an.¹⁰ Ko dun wadi si mido weltii fii lo'ereeji din e hoyreeji din e sattendeeji din e cukkande den e anndeeji din fii Almasiihu on. Ko fii, nde mi laatii lo'udo, ko onsay mi woni dolnudo.

Fii Annde nde Puulusa Joganii ɓe Korenti ɓen nden

¹¹ Mi wa'uno wa komoojo, kono ko onon karhunoo mi, bay ko onon haanuno kuljude lan! Ko fii hay huunde mi seedaa e ɓen «sahaabaabe townitiibe», fii kala hinaa mi huunde.¹² Maandeeji holludi fii sahaabaabe ɓen wadiraama yeeso mon nannannde tiidunde, dün ko maandeeji e kuude e kaawakeeji moyyi.¹³ Ko hondun deya *mofte hebi ko on hebaali, si wonaa mi wonanaali on dongal? Awa yaafanee lan on ella don!

¹⁴ Awa e hino, mido faalaa yahude ka mon tammun, e hoore mi wonoytaa dongal mon, ko fii mi alaa dabbude ko mon kon, kono ko onon tigi, bay hinaa paykoy koy haani marande mawbe mun ɓen, kono ko mawbe ɓen haani marande faybe mun ɓen.¹⁵ Min mi wonay anniyyido fii fawtagol, e mi fawtoto hoore an fii wonkiji mon din. Si mi burtii on yidude, e hara giggol mon ngol e telen-ma an duytoto?

¹⁶ Awa, mi wonanaali on dongal. E hara mi laatike neddo yoydo? Kaa mi hendorii on janfa?¹⁷ Kaa mi rewii e goddo e ɓe mi imminani on ɓen fii huutorgol on?

¹⁸ Awa, mi wakkilinii Tiituusa fii yahugol ka mon, mi immindinii mo e musiddo goo. Enee, taw si hara Tiituusa huutorii on onon fii hebugol goddun? E taw si hara kadi men jokkaali anniyyee gooto e ebbingoe goote?

¹⁹ No gasa hidon sikka gila neebii wonde men danditoto woni e telen-ma mon. Awa, ko yeeso Alla e innde Almasiihu on men woni yewtirde. Dun fow non, yo yibbe, ko fii tiidengol on.²⁰ Ko fii mido huli, nde mi hewtoyi, no gasa mi tawroya

on hara hinaa no mi faaliraa non, e min kadi no gasa hara hinaa no faaliradon non. Mido huli wota taw no gasa hara ko yeddondiral e nawliigu e monee e haasidi e noore e baddi e mawnintinaare e jiiboldu woni hakkunde mon.²¹ Mido huli, nde mi hewtoyi ka mon, wota Alla an on hersinoyan kadi e yeeso mon, mi wona e yoomugol fii wadunoobe junuubu duudube, be ronki tuubude ngal angal laabal e jinaa e jiibaare nde be wadi nden.

Fii Hajande Puulusa Sakkitore den

13

¹ Mido yahude ka mon tammun. Kala kongol jaawiroyte kongudi seedeebe dido maa tato. ² Wa fewndo ko mi wonnoo ka mon dimmun, hari mi wowliino dun. Awa hande kadi, ka tawata mi alaa ton, mi wolani dun kadi wadunoobe junuubu ben ado mi yahude: si mi yiltoyike ka mon mi woopoytaa hay gooto, ³ ko fii hidon dabbude seedee wonde ko *Almasiihu on woni longinde lan ko mi woni wowlude kon, on mo lo'aa e telen-ma mon, kono mardo bawgal e hakkunde mon. ⁴ Ko fii fewndo Almasiihu on fempanoo, hari ko o lo'udo, kono jooni himo wuuriri bawgal Alla ngal. Menen kadi e nder humondiral amen e makko, ko men lo'ube, kono menen e makko men wuuriray bawgal Alla ngal fii mon. ⁵ Awa taskee hoore mon onon tigi fii andugol si hidon wuuriri gomdinal, ndarnditodon onon tigi. E on andaa Iisaa Almasiihu on no e mon? Si hinaa taw on woopu ndarnditagol mon ngol. ⁶ Kono mido tanyinii on taway wonde en woopali ndarnditagol men ngol. ⁷ Ko e nder dun men torotoo Alla fii wota on wadu huunde ko boni. Hinaa non fii hollugol wonde men felnaaki, kono ko fii yo on wadu ko moyyi, hay si tawii menen meden wa'i wa woopube. ⁸ Ko fii men waawanaa goonga on hay huunde. Kono ko wonangol goonga on men waawi. ⁹ Menen men weltoto nde men lo'i, e hin-le onon hidon dolni, e ko men yelootoo e nder torndeeji amen din, ko fii no laatoron timmube. ¹⁰ Ko dun wadi si mido windande on dun si mi alaa ton, fii nde

mi aroyi, wota mi sattiniran on huutorgol mbawdi fii laamagol on ndi Joomiraado on yedimmi ndin fii tiidengol on, hara hinaa fii libugol on.

Fii Rawnoode Batakuru ndun e Salminaango mun

¹¹ Fii rawnagol, yo musibbe, wonee e nder weltaare, ebbanee wonugol timmube, wakkilindiron, hebon mijo wooto, wondiron buttu. Dun, Alla Jom giggol e buttu on wonday e mon.

¹² Salmondiree, hirbondiron hirbondiral laabungal. Awa kadi gomdinbe ben fow salminii on. ¹³ Yo moyere Iisaa Almasiihu Joomi on, e giggol Alla, wonu e mon on fow, wondude e humondiral e *Ruuuhu Seniido on.

DEUXIÈME ÉPÎTRE DE PAUL AUX CORINTHIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée